

अथैकादशोऽध्यायः

ग्याह्रमाँ बिराटरूपदर्शन अब्द्ध्याय

अर्जुन उवाच

मदनुग्रहाय परमं, गुह्यमध्यात्मसंज्ञितम् ।
यत् त्वयोक्तं वचस्तेन, मोहोऽयं विगतो मम ॥ १

अर्जुन बोल्ल्या

(दिखा आपणाँ रूप ईसरी)

मेरै ऊप्पर क्रिपा करण नै, घणा गुपत 'अब्द्ध्यातम' नाँ का ।
जो इब तत्रै कह्या वचन सै, उस तँ मोह यो मित गया मेरा ॥ १

भवाप्ययौ हि भूतानां, श्रुतौ विस्तरशो मया ।

त्वत्तः कमलपत्राक्ष, माहात्म्यमपि चाव्ययम् ॥ २

जलम मरण क्यूँकी भूत्ताँ के, सुणे सँ विस्तार तँ मत्रै ।
तेरै तँ केवलनैण किरसण, ओर महात्तम बी अविनासी ॥ २

एवमेतद् यथाऽऽत्थ त्वमात्मानं परमेश्वर ।

द्रष्टुमिच्छामि ते रूपमैश्वरं पुरुषोत्तम ॥ ३

न्यूँ यो ज्यूँ बोल्ल्या सै तत्रै, आप्पा आप्णा हे परमेसर ।
देक्ख्या चाहूँ सूँ मैँ तेरा, रूप ईसरी हे परसोत्तम ॥ ३

मन्यसे यदि तच्छक्यं, मया द्रष्टुमिति प्रभो ।

योगेश्वर ततो मे त्वं, दर्शयात्मानमव्ययम् ॥ ४

समझै तँ जो देख सकूँ मैँ, वो हे परभू, हे योगेसर ।
तो मत्रै तँ ईब दिखा दे, आप्पा तेरा अविनासी ॥ ४

श्रीभगवानुवाच

पश्य मे पार्थ रूपाणि, शतशोऽथ सहस्रशः ।

नानाविधानि दिव्यानि, नानावर्णाकृतीनि च ॥ ५

स्रीभगवान् बोले

(अर्जन, मेरे रूप देख तँ)

देख तँ मेरे रूप अर्जन, सै-सै सँ ओर हज़ाराँ जो ।
तहाँ-तहाँ के दिव्य भोत से, रङ्गाँ आळे, सिकल्याँ आळे ॥ ५

पश्यादित्यान् वसून् रुद्रानश्विनौ मरुतस्तथा ।

बहून्यदृष्टपूर्वाणि, पश्याश्वर्याणि भारत ॥ ६

देख सूरजाँ नै, वसुआँ नै, रुद्राँ, दो अस्विन्, मरुताँ नै ।
भोत, नहीं जो देखे पहल्याँ, देख अजूबे वैँ तँ अर्जन ॥ ६

इहैकस्थं जगत् कृत्स्नं, पश्याद्य सचराचरम् ।

मम देहे गुडाकेश, यच्चान्यद् द्रष्टुमिच्छसि ॥ ७

इत एक जहाँ स्थित जग पूरा, देख आज सँग जङ्गम स्थावर ।
मेरी काया मैँ रै अर्जन, जो ओर किमे देक्ख्या चाहै ॥ ७

न तु मां शक्यसे, द्रष्टुमनेनैव स्वचक्षुसा ।

दिव्यं ददामि ते चक्षुः, पश्य मे योगमैश्वरम् ॥ ८

(दिव्य द्रिस्टि देऊँ तत्रै)

नाँ, पर, मत्रै सकै देख तँ, इस्सै आप्णी द्रिस्टी तँ सै ।
प्राकृत जग मैँ जो नाँ मिलदी, मैँ देऊँ तत्रै वा द्रिस्टी ।
'दिव्य' अजूबे देखण आळी, देख जुगाड़ा मुझ ईस्सर का ॥ ८

संजय उवाच

एवमुक्त्वा ततो राजन्, महायोगेश्वरो हरिः ।

दर्शयामास पार्थाय, परमं रूपमैश्वरम् ॥ ९

सञ्जै बोल्ल्या

(दिव्य रूप का मोटा वर्णन)

न्यूँ कह पाच्छै हे राजा जी, बड्डै योगेसर किरसण नै ।
दरसाया पिरथा कै सुत तँ, सब तँ आच्छा रूप ईसरी ॥ ९

अनेकवक्त्रनयनमनेकाद्भुतदर्शनम् ।

अनेकदिव्याभरणं, दिव्यानेकोद्यतायुधम् ॥ १०

घणै मुँहाँ अर आँख्याँ आळा, भोत अजूबे जिस मैं दीकखँ।
भोत विचित्र गहण्याँ आळा, अद्भुत भोत उठाए अस्तर ॥ १०

दिव्यमाल्याम्बरधरं, दिव्यगन्धानुलेपनम्।
सर्वाश्चर्यमयं देवमनन्तं विश्वतोमुखम् ॥ ११

अद्भुत माळा बस्तर पहरे, दिव्य सुगन्धित लेप लगाए।
सारे अचरज धारण करदा, नाँ ओड़ मिलै जिस का कितै।
सबै दिसा मैं मूढ्याँ आळा, देव दिखाया किरसण नै तद ॥ ११

दिवि सूर्यसहस्रस्य, भवेद् युगपदुत्थिता।
यदि भाः सदृशी सा स्याद्, भासस्तस्य महात्मनः ॥ १२

आसमाँ मैं हजारों सूरज, हौँ कट्टे अर चौँध सभी की।
जै चौँध बरोब्बर वा होवै, उस महादेव कै चिमकण की ॥ १२

तत्रैकस्थं जगत् कृत्स्नं, प्रविभक्तमनेकधा।
अपश्यद्देवदेवस्य, शरीरे पाण्डवस्तदा ॥ १३

(साब्बत दुनियाँ उत देखी)

उत एक जघाँ स्थित जग पूरा, बँड्या खड़्या जो कई तहाँ तँ।
देकख्या देवत्याँ कै देव कै, तन मैं पाण्डू कै सुत नै तद ॥ १३

ततः स विस्मयाविष्टो, हृष्टरोमा धनंजय।
प्रणम्य शिरसा देवं, कृताञ्जलिरभाषत ॥ १४

(अचरज मैं भर अर्जन बोल्ल्या)

उस पाच्छै वो अचरज मैं पड़, खड़े रूंगट्याँ आळा हो कै।
नवा सीस अर हाथ जोड़ कै, देव तई न्यूँ अर्जन बोल्ल्या ॥ १४

अर्जुन उवाच

पश्यामि देवांस्तव देव देहे, सर्वास्तथा भूतविशेषसङ्गान्।
ब्रह्माणमीशं कमलासनस्थमूर्षींश्च सर्वानुरगांश्च दिव्यान् ॥ १५

अर्जन बोल्ल्या

(मन्नै देकख्या रूप अजूब्बा)

देकखँ इब सूँ सब देवाँ नै, तेरी, हे देव, देह मैं मैं।
खास तहाँ के स्थावर जङ्गम, जेर-लपेट्टे, स्त्रीयोनी तँ ॥
अण्डै तँ अर बीज फोड़ कै, पैदा होणाळे भूत्ताँ के।
बड़े-बड़े जो झुण्ड घणै सँ, उन नै देकखँ सार्याँ नै मैं ॥
बिस्पू कै नाभिकमल मैं स्थित, ब्रह्मा नै, सङ्कर नै, सारे।
रिसियाँ नै, अद्भुत साँप्पाँ नै ॥ १५

अनेकबाहूदरवक्त्रनेत्रं, पश्यामि त्वां सर्वतोऽनन्तरूपम्।

नान्तं न मध्यं न पुनस्तवादिं, पश्यामि विश्वेश्वर विश्वरूपम् ॥ १६

भोत भुजा, मुँह पेट र आँकख्याँ, आळै नै अर सभी ओड़ तँ।
बेअन्त रूप बणावण आळै, देकखँ तन्नै भगवन्, मैं सूँ ॥
ओड़, नाँ ए बीच तेरा, सरुआत कितै नाँ देकखँ सूँ।
जग के स्वामी जगरूप हरे ॥ १६

किरीटिनं गदिनं चक्रिणं च, तेजोराशिं सर्वतो दीप्तिमन्तम्।

पश्यामि त्वां दुर्निरीक्ष्यं समन्ताद् दीप्तानलार्कद्युतिमप्रमेयम् ॥ १७

मुकुट गदा अर चक्र धारदा, ढेर तेज का सबै तरफ तँ।
झळ मारै अर देकख्या नाँ जा, च्यारूँ कान्हौँ बळदी अग्री ॥
सूरज की झळ आळै जिस नै, माप सकै नाँ कोए, न्यूँ ए।
तन्नै देकखँ किरसण, मैं सूँ ॥ १७

त्वमक्षरं परमं वेदितव्यं, त्वमस्य विश्वस्य परं निधानम्।

त्वमव्ययः शाश्वतधर्मगोप्ता, सनातनस्त्वं पुरुषोमतो मे ॥ १८

तँ अविनासी, सब तँ ऊँच्चा, जाणन जोगगा ततव परम तँ।
तँ इस जग का परम ठिकाणा, तँ अविकारी सै अर तँ सै ॥
धर्म सनातन का रखवाळा, सदा रहै जो, पुरुस इसा तँ।
मन्नै मान्या सै परसोतम ॥ १८

अनादिमध्यान्तमनन्तवीर्यमनन्तबाहुं शशिसूर्यनेत्रम्।

पश्यामि त्वा दीप्तहुताशवक्त्रं, स्वतेजरसा विश्वमिदं तपन्तम् ॥

देस, समै तँ सरुआत, बीच, ओड़ नास बी जिस के नाँ हौं।
बे-ओड़ पराक्रम जिस का सै, गिणी न जावँ बाजू आळा।
चन्दा सूरज आँक्य्याँ आळा, बलदी अग्री-से मुँह आळा।
निज तेज तँ जग यो तपान्दा, देक्खूँ तन्नै किरसण मैं सूँ॥ १९

द्यावापृथिव्योरिदमन्तरं हि, व्याप्तं त्वयैकेन दिशश्च सर्वाः।

दृष्ट्वाद्भुतं रूपमुग्रं तवेदं, लोकत्रयं प्रव्यथितं महात्मन्॥ २०

नभ धरती का यो बीच्चा, व्याप राक्ख्या एक तन्नै सै।
ओर दिसा सारी, अजीब-सा, देक्खूँ अचरज पैदा करदा।।
आकार भयंकर तेरा यो, लोक तीन सँ डर तँ व्याकुल।

महापुरुस हे महा आतमा॥ २०

अमी हि त्वां सुरसङ्गा विशन्ति, केचिद्धीताः प्राञ्जलयो गृणन्ति।

स्वस्तीत्युक्त्वा महर्षिसिद्धसङ्गाः, स्तुवन्ति त्वां स्तुतिभिः पुष्कलाभिः॥ २१

ये तेरै मैं देवाँ के गण, बड़ैँ समावँ कोए डरदे।
हाथ जोड़ कैँ सँ ये तेरी, स्तुति करदे, 'कल्याण जगत् का'।।
'बण्या रहे जग आच्छी तहियाँ', न्युँ कह कैँ रिसि मुनि सिद्धाँ के गण।
करैँ प्रसँसा तेरी भोत्ती, स्तुतियाँ करदे सारे किरसण॥ २१

रुद्रादित्या वसवो ये च साध्या, विश्वेऽश्विनौ मरुतश्चोष्मपाश्च।

गन्धर्वयक्षासुरसिद्धासङ्गा, वीक्षन्ते त्वां विस्मिताश्चैव सर्वे॥ २२

ग्यारा रुद्र, अदितिसुत बारा, आठ वसू अर साध्याँ के गण।
विस्वे देव तथा दो अस्विन्, सात-सात के सात मरुद्गण॥
गरम-गरम हो भोजन जिब तक, भाँफ उठै जो, उस नै पीन्दे।
स्राद्ध करम मैं पितर तिरपत, भाँफ छोडदा भोजन खा कैँ।।
गीत, नाँच, घूँघर, बाज्ज्याँ, अर मीट्टी वाणी तँ मन मोहँ।
गन्धर्व इसे, यक्ष सुपूजित, सिद्ध, असुर सब अर्ध देवगण।
देक्खूँ तन्नै चकित, ठगे-से, मूँढे बाए अचरज मैं भर॥ २२

रूपं महत्ते बहुवक्त्रनेत्रं, महाबाहो बहुबाहूरुपादम्॥

बहूदरं बहुदंष्ट्राकरालं, दृष्ट्वा लोकाः प्रव्यथितास्तथाहम्॥ २३

रूप बड़ा तेरा भोत मुँहाँ, आँक्य्याँ आळा बडी भुजा आळे।
भोत भुजा जाड्वाँ पाँ आळा, सै अर भोत पेट सँ इस मैं।
बिकराळ घणी जाडँ तँ यो, देख लोक सँ व्याकुल अर मैं॥ २३

नभःस्पशं दीप्तमनेकवर्णं, व्यात्ताननं दीप्तविशलनेत्रम्।

दृष्ट्वा हि त्वां प्रव्यथितान्तरात्मा, धृतिं न विन्दामि शमं च विष्णो॥ २४

आकास छूणियँ अर बळदै, तहाँ-तहाँ के रङ्ग बदळदै।
मुँह पाड़्यै बळदी-सी मोट्टी, आँक्य्याँ आळै लख कैँ तन्नै।
डर कै मारै सहम्या-सा मैं, धीरज नाँ पान्दा स्यान्ती बी॥ २४

दंष्ट्राकरालानि च ते मुखानि, दृष्ट्वैव कालानलसन्निभानि।

दिशो न जाने न लभे च शर्म, प्रसीद देवेश जगन्निवास॥ २५

जाडँ तँ बिकराळ दीखदे, तेरे मूँढे देख घणे से।
प्रळै समै की अग्री-से ये, दिसा समझ मैं नाँ सँ आन्दी।
हक्का-बक्का, भाँचक मैं सूँ, नाँ ए पान्दा सुख चैन तथा।
राज्जी हो ज्या देवपती हे, सारे जग का बास्सा रै तँ॥ २५

अमी च त्वां धृतराष्ट्रस्य पुत्राः, सर्वे सहैवावनिपालसङ्घैः।

भीष्मो द्रोणः सूतपुत्रस्तथासौ, सहास्मदीयैरपि योधमुख्यैः॥ २६

ये अर तन्नै धृतिरास्टर के, बेट्टे सारे सँग राज्याँ कै।
भीसम द्रोण'र गडुवाळै का, बेट्टा वो, सँग म्हारे बी सँ।
जोध्याँ मैं मुखिये जो उन कै॥ २६

वक्त्राणि ते त्वरमाणा विशन्ति, दंष्ट्राकरालानि भयानकानि।

केचिद्विलग्ना दशनान्तरेषु संदृश्यन्ते चूर्णितैरुत्तमाङ्गैः॥ २७

जाडँ तँ बिकराळ डराँदे, मूँढ्याँ मैं तेरै तावळ तँ।
बड़दे सारे, कोए फँसदे, दाँत-बिचाळै दीक्खूँ सँ ये।
टुकड़े-टुकड़े बणे सिराँ तँ॥ २७

यथा नदीनां बहवोऽम्बुवेगाः, समुद्रमेवाभिमुखा द्रवन्ति ।

तथा तवामी नरलोकवीरा, विशन्ति वक्त्राण्यभिविज्वलन्ति ॥ २८

ज्यूँ नदियाँ कै पाणी के सैं, रेले भोत जोर तैं बहँदे ।
सागगर कान्हीं भाजै जान्दे, न्यूँ तेरे ये वीर पुरुस सैं ।
बड़दे बळदे, क्रिष्ण, मुँहाँ मैं ॥ २८

यथा प्रदीमं ज्वलनं पतङ्गा, विशन्ति नाशाय समृद्धवेगाः ।

तथैव नाशाय विशन्ति लोकास्तवापि वक्त्राणि समृद्धवेगाः ॥ २९

ज्यूँ बळदी आग मैं पतङ्गे, बड़ैं मरण नै बड़ै बेग तैं ।
न्यूँ ए नस्त होण नै बड़दे, लोक तेरै बी ये लोग मुखाँ मैं ।
बड़ी जोर तैं खिँचदे आन्दे, बढ्योड़ै बेग आळे सारे ॥ २९

लेलिह्यसे ग्रसमानः समन्ताल्लोकान्समग्रान्द्वनैर्ज्वलद्भिः ।

तेजोभिरापूर्व्यं जगत्समग्रं, भासस्तवोग्राः प्रतपन्ति विष्णो ॥ ३०

चाट रह्या तैं होठ भोत सै, गास बणाँदा च्यारूँ कान्हीं ।
साब्वत लोकाँ नै तैं जळदे, बळदे आप्णै मुँढ्याँ तैं सै ।
तेजाँ तैं भर दुनियाँ सारी, झळ ये तेरी उग्र भयानक ।
खूब जळवैँ सैं हे बिष्णू ॥ ३०

(अर्जन पूच्छै आप कोण सो?)

आख्याहि मे को भवानुग्ररूपो, नमोऽस्तु ते देववर प्रसीद ।

विज्ञातुमिच्छामि भवन्तमाद्यं, न हि प्रजानामि तव प्रवृत्तिम् ॥ ३१

कह तैं मत्रै कोण आप सो?, घोर भयङ्कर रूप्पाँ आळे?
देवाँ मैं सब तैं आच्छे, प्रणाम तत्रै, इब खुस हो ज्या ॥
जाणना चाहूँ आप नै मैं, आदी कारण सिस्टी कै नै ।
नाँ मैं जाणूँ तेरी हरकत ॥ ३१

श्रीभगवानुवाच

कालोऽस्मि लोकक्षयकृत्प्रवृद्धो, लोकान्समाहर्तुमिह प्रवृत्तः ।

ऋतेऽपि त्वां न भविष्यन्ति सर्वे, येऽवस्थिताः प्रत्यनीकेषु योधाः ॥ ३२

श्रीभगवान् बोले

(काळ बली सँ सब नै गसदा)

काळ भोत सँ बड्डे होड़ा, लोकाँ का मैं नाँस करणियाँ ।
दुनियाँ नै समेटण नै अडै, हरकत मैं सँ मैं न्यूँ लाग्या ॥
बिन बी तेरै नहीं रहँगे, सारे जो सँ खड़े स्याम्ह नै ।
आप्पस मैं इन लड़नै आळी, फोज्जाँ मैं सँ जो जोधे ॥ ३२

तस्मात्त्वमुत्तिष्ठ यशो लभस्व, जित्वा शत्रून् भुङ्क्ष्व राज्यं समृद्धम् ।

मयैवैते निहताः पूर्वमेव, निमित्तमात्रं भव सव्यसाचिन् ॥ ३३

(तैं तो सिरफ निमित ए बण ज्या)

इस कारण तैं उठ, जस ले ले, जीत कै तैं दुस्मनाँ नै यो ।
भोग राज तैं ठाठ मारदा, हर तहियाँ खुसहाल भोत जो ॥
मत्रै ए ये मार दिये सैं, पहल्याँ ए, तैं तो इन की ।
भान्ना मात्र बण म्रित्यु का, खब्वै तैं बी काम लेणिये ॥ ३३

द्रोणं च भीष्मं च जयद्रथं च, कर्णं तथान्यानपि योधवीरान् ।

मया हतांस्त्वं जहि मा व्यथिष्ठा, युध्यस्व जेतासि रणे सपत्नान् ॥ ३४

द्रोण'र भीसम, करण, जयद्रथ, सैं ओर बी जो वीर जोधे ।
मत्रै मारे इन नैं तैं इब, मार, मत न्याँ दुख तैं बिचळै ।
लड़ ज्या अर्जन, जीतैगा तैं, जुध मैं आप्णै दुस्मनाँ नै रै ॥ ३४

संजय उवाच

एतच्छ्रुत्वा वचनं केशवस्य, कृताञ्जलिवेपमानः किरीटी ।

नमस्कृत्वा भूय एवाह कृष्णां, सगद्गदं भीतभीतः प्रणम्य ॥ ३५

सञ्जै बोल्त्या

(अर्जन नै उसकी करी बन्दगी)

या सुण बात किसन की अर्जन, हाथ जोड़, अर मात्थै ला कै ।
धूज रह्या डर तैं अर भाँचक, भर्यै गळै तैं, डर्या-डर्या-सा ।

कर नमस्कार फेर-फेर वो, झुक कैँ बोल्ल्या किरसण नै न्यूँ ॥ ३५

अर्जुन उवाच

स्थाने हृषीकेश तव प्रकीर्त्या, जगत्प्रहृष्यत्यनुरज्यते च ।
रक्षांसि भीतानि दिशो द्रवन्ति, सर्वे नमस्यन्ति च सिद्धसंधाः ॥ ३६

अर्जन बोल्ल्या

बिसयाँ का अनुभव, कर्म करा, खुस जो करदी इन्द्रिय उन के ।
स्वामी किरसण, तेरे गुण गा, जग खुस हो सै अर प्रेम करै ।
राकस डरदे चहुँ दिसि भाज्जै, सारे अर करदे प्रणाम सैँ ।

सिद्ध जनाँ के गण ये तन्नै ॥ ३६

कस्माच्च ते न नमेरन्महात्मन्, गरीयसे ब्रह्मणोऽप्यादिकर्त्रे ।

अनन्त देवेश जगन्निवास, त्वमक्षरं सदसत्तत्परं यत् ॥ ३७

क्यूँ अर ओर बड्याँ तैँ बड्डै, ब्रह्मा के बी पहलैँ कर्ता ।
तेरै आगैँ नहीं झुकैँ क्यूँ? 'महत्' परम हे सब के आत्मा ॥
अन्तरहित, देवाँ के स्वामी, दुनियाँ नै हे बास कराणे ।
तैँ अविकारी, नित्य रहणियाँ, नाँ रहणाळा तैँ, अर उन तैँ ॥
ऊपर जो सै, वो सै तैँ ए, कारण सत् अर कारज नाँ सत् ।
दोत्राँ सै तैँ किरसण निस्चै ॥ ३७

त्वमादिदेवः पुरुषः पुराणस्त्वमस्य विश्वस्य परं निधानम् ।

वेत्तासि वेद्यं च परं च धाम, त्वया ततं विश्वमनन्तरूप ॥ ३८

तैँ देवाँ का मूळ देव सै, पुरुस पुराणा सै रै किरसण ।
तैँ इस जग का परम ठिकाणा, जिस मैँ जा कैँ लीन सबै हौँ ॥
जाणनियाँ तैँ, ग्यानविसै तैँ, परमतेज अर परम स्थान तैँ ।
तन्नै फैलाई या दुनियाँ, हे अन्तरहित रूप्याँ आळे ॥ ३८

वायुर्यमोऽग्निर्वरुणः शशाङ्कः, प्रजापतिस्त्वं प्रपितामहश्च ।

नमो नमस्तेऽस्तु सहस्रकृत्वः, पुनश्च भूयोऽपि नमो नमस्ते ॥ ३९

हवा, आग, यम, वरुण, चन्द्रमा, परजापत तैँ, दाद्याँ का बी ।

पिता परम तैँ, बडका दादा, फिर-फिर हो नमस्कार तन्नै ।
बार हजाराँ फिर-फिर फिर तैँ, नमस्कार नमस्कार तन्नै ॥ ३९

नमः पुरस्तादथ पृष्ठतस्ते, नमोऽस्तु ते सर्वत एव सर्व ।

अनन्तवीर्यामितविक्रमस्त्वं, सर्वं समाप्रोषि ततोऽसि सर्वः ॥ ४०

नमन करूँ सूँ स्याम्हीं तैँ अर, पाच्छै तैँ, तन्नै मैँ भगवन् ।
प्रणाम तन्नै सब कान्हीं तैँ, सब कुछ हे, तैँ अनन्त ताकत ॥
बेमाप पराक्रम आळा तैँ, सब कुछ व्याप्यै इस कारण सै ।
सब रूप्याँ मैँ सै सब कुछ तैँ ए ॥ ४०

सखेति मत्वा प्रसभं यदुक्तं, हे कृष्ण हे यादव हे सखेति ।

अजानता महिमानं तवेदं, मया प्रमादात्प्रणयेन वापि ॥ ४१

'सुख-दुख मिल बाँड बतावणियाँ, सखा मित्र सै', मान, जबरियन ।
जो बोल्ल्या, 'हे किरसण यादव, मित्र, सखा', न्यूँ नहीं जाणदै ।
महिमा तेरी, यो सै मन्नै, नाँसमझी, प्रेम भाव तैँ या ॥ ४१

यच्चावहासार्थमसत्कृतोऽसि, विहारशय्यासनभोजनेषु ।

एकोऽथवाऽप्यच्युत तत्समक्षं, तत्क्षामये त्वामहमप्रमेयम् ॥ ४२

अर जो हाँस्सी मैँ बी मन्नै, अपमान कर्या तेरा कदे ।
सैर-सपाट्टै, सोणै-खाणै, बैटुक मिल बैठ जमाणै मैँ ॥
एक अकेल्लै या फिर अच्युत, नहीं डिगणिये निज सुभाव तैँ ।
या वो होया सब कैँ स्याम्हीं, उस की माँगूँ माफ्फी सूँ मैँ ।
परमाणै तैँ नाँ नाप्पी जा, महिमा आळै तन्नै किरसण ॥ ४२

पिताऽसि लोकस्य चराचरस्य, त्वमस्य पूज्यश्च गुरुर्गरीयान् ।

न त्वत्समोऽस्त्यभ्यधिकः कुतोऽन्यो, लोकत्रयेऽप्यप्रतिमप्रभाव ॥ ४३

बीज गेर कैँ जलम देणियाँ, पालन पोसण बी तैँ करदा ।
जग जो जङ्गम स्थावर सै ये, तैँ सै इस का पूज्जण जोगगा ।
गरु तैँ बी तैँ बडा गरु सै, नाँ तैँ-सा सै, जादा कित तैँ ।
कोए होवै तीन लोक मैँ, नाँ सै उपमा जिस की कोए ।

तस्मात्प्रणम्य प्रणिधाय कायं, प्रसादये त्वामहमीशमीड्यम् ।

पितेव पुत्रस्य सखेव सख्युः, प्रियः प्रियायार्हसि देव सोढुम् ॥ ४४

इस कारण मैं सीस झुका कै, कर दण्डोती राज्जी करदा ।
खुस होणै नै तनै मनाऊँ, स्तुति कै जोगै ईस्सर नै ॥
बाब्बू बेट्टै का ज्यूँ करदा, मित्तर का ज्यूँ अर प्यारा ।
आप्णी प्यारी का अर प्रीतम, आप्णी प्यारी कै ज्यूँ करदा ॥
माफ घणी सै गलती सारी, ओर सहै सैं उन नै, न्यूँ सै ।

गलती मेरी सहणा बाजिब ॥ ४४

अदृष्टपूर्वं हृषितोऽस्मि दृष्ट्वा, भयेन च प्रव्यथितं मनो मे ।

तदेव मे दर्शय देव रूपं, प्रसीद देवेश जगन्निवास ॥ ४५

(वो ए मन्त्रै रूप दिखा तैं)

नाँ जो देक्ख्या पहल्याँ उस नै, देख खुसी सै मन्त्रै अर सै ।
डर तैं ब्याकुल मन यो मेरा, वो ए मन्त्रै दिखा रूप तैं ।
देवाँ के हे ईस, देवता, खुस हो ज्या हे दुनियाँ भर सै ।
रहँदी जिस मैं, वो परमेसर ॥ ४५

किरीटिनं गदिनं चक्रहस्तमिच्छामि त्वां द्रष्टुमहं तथैव ।

तेनैव रूपेण चतुर्भुजेन, सहस्रबाहो भव विश्वमूर्ते ॥ ४६

मुकुट गदा नै धारण करदा, अर चक्र सुदर्शन हाथ लिये ।
चाहूँ तन्नै देक्ख्या मैं सूँ, उसै ढाळ का, पहल्याँ जो था ।
उस्सै च्यार भुजावाँ आळै, रूप तैं तैं इब युक्त हो ज्या ।
सहस्र भुजाँ आळै, अर यो जग, जिस की मूरत सै परमेसर ॥ ४६

श्रीभगवानुवाच

मया प्रसन्नेन तवार्जुनेदं, रूपं परं दर्शितमात्मयोगात् ।

तेजोमयं विश्वमनन्तमाद्यं यन्मे त्वदन्येन न दृष्टपूर्वम् ॥ ४७

श्रीभगवान् बोले

(खुस हो मन्त्रै रूप दिखाया)

मन्त्रै राज्जी हो कै तन्नै, यो रूप परम दिखलाया सै ।
आप्णी माया तैं, तेजस्वी, सब अन्तरहित मूळ जगत् का ।
जो मेरा तेरै तैं दूजै, नहीं किसै नै देक्ख्या पहल्याँ ॥ ४७

न वेदयज्ञाध्ययनैर्न दानैर्, न च क्रियाभिर्न तपोभिरुग्रैः ।

एवंरूपः शक्य अहं नृलोके, द्रष्टुं त्वदन्येन कुरुप्रवीर ॥ ४८

(पुण्ण्याँ तैं बी दीक्खै नाँ यो)

नाँ वेद यग्य तैं, पढणै तैं, नाँ भोत तह्णाँ के दानाँ तैं ।
नाँ भोत तह्णाँ के कमाँ तैं, नाँ घोर तपस्या बी कर कै ॥
इसै रूप कै मन्त्रै कोए, माणसाँ कै इस लोक मैं सै ।
देख सकै तेरै तै भिन नर, कुरुआँ मैं हे स्रेष्ठ बहादर ॥ ४८

मा ते व्यथा मा च विमूढभावो, दृष्ट्वा रूपं घोरमीदृङ् ममेदम् ।

व्यपेतभीः प्रीतमनाः पुनस्त्वं, तदेव मे रूपमिदं प्रपश्य ॥ ४९

(वो ए मेरा रूप देख तैं)

नाँ तैं डर अर व्याकुल नाँ हो, नाँ ए मोह भरम बी होवै ।
मेरा यो तैं इसा भयानक, रूप देख कै नाँ घबरावै ।
निर्भै, खुसदिल हो कै तैं फिर, वो ए मेरा रूप देख यो ॥ ४९

संजय उवाच

इत्यर्जुनं वासुदेवस्तथोक्त्वा, स्वकं रूपं दर्शयामास भूयः ।

आश्वासयामास च भीतमेनं, भूत्वा पुनः सौम्यवपुर्महात्मा ॥ ५०

सञ्जै बोल्छा

(किरसण नै फिर वो रूप दिखाया)

अर्जुन तैं वसुदेवपुत्र नै, न्यूँ कह निज रूप दिखाया फिर ।
थ्यावस बाँध्या डरदै इस नै, हो कै फिर तैं सान्त देह का ।
करुणा करणाँ पूज्य आतमा ॥ ५०

अर्जुन उवाच

दृष्ट्वेदं मानुषं रूपं, तव सौम्यं जनार्दन।
इदानीमस्मि संवृत्तः, सचेताः प्रकृतिं गतः॥५१

अर्जन बोले

(माणस तन मैं देख तनै, आप्पै मैं सूँ मैं आया)
देख यो माणस का सान्त सरळ, रूप तेरा हे जन जन की।
माँग पूरी करणै आळे, दुस्ट जनाँ नै पीड़ित करदे।
ईब मैं सूँ हो गया चेतन, आप्णै सुभाव मैं अर आ गया॥ ५१

श्रीभगवानुवाच

सुदुर्दर्शमिदं रूपं, दृष्ट्वानसि यन्मम।
देवा अप्यस्य रूपस्य, नित्यं दर्शनकाङ्क्षिणः॥ ५२

श्रीभगवान् बोले

(रूप इसा यो भक्ती तैं दीक्खै)

भोक्तै मुस्कल जिसै देखणा, रूप इसा जो देख्या मेरा।
देवते बी इस रूप नै सैं, अर्जन, सदा देखणा चाहैं॥ ५२

नाहं वेदैर्न तपसा, न दानेन न चेज्यया।

शक्य एवविधो द्रष्टुं, दृष्ट्वानसि मां यथा॥५३

नाँ मैं बेद्दाँ तैं नाँ तप तैं, नाँ दानाँ तैं, नाँ यग्याँ तैं।
देक्ख्या जाऊँ इस तहियाँ का, देक्ख्या तन्नै मैं जिस तहियाँ॥५३

भक्त्या त्वनन्यया शक्य, अहमेवविधोऽर्जुन।

ज्ञातुं द्रष्टुं च तत्त्वेन, प्रवेष्टुं च परंतप॥५४

ओर किसै की नाँ होणाळी, भक्ती तैं मैं इस तहियाँ का।
जाण्या देक्ख्या जा सकदा, असलीयत मैं प्रवेस बी सै।
मुझ मैं पा सकदा मैं बण कैँ, दुस्मन नै हे दुक्खी करणे॥ ५४

मत्कर्मकृन् मत्परमो, मद्भक्तः सङ्गवर्जितः।

निर्वैरः सर्वभूतेषु, यः स मामेति पाण्डव॥५५

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां योगशास्त्रे
श्रीकृष्णार्जुनसंवादे विश्वरूपदर्शनयोगो नामैकादशोऽध्यायः॥११॥

मेरी खात्तर करम करणियाँ, मन्नै परम लक्स्य जो समझै।
मेरा भगत सहारै मेरै, ओर फँस्या नाँ कित्तै होवै।
बैर-बिरोध कदे नाँ करदा, सारे भूत्ताँ मैं कित्तै जो।
वो मन्नै पावै पाण्डूसुत॥ ५५

श्रीमती सीतादेब्बी अर श्रीश्रीनिवास सास्तरी कै बेट्टै सिवनारायण
सास्तरी कै हरियाणी भास्सा कै गीतायन काब्ब्यभास्स्य मैं
ग्याह्रमाँ अध्याय पूरा होया॥ ११॥

पूर्वसलोकयोग ४१४ + ५५ = ४६९